

Maiorità persvasa dals effects positivs

Debatta detagliada davart l'olimpiada 2026 en Grischun

■ (anr/fa) L'olimpiada 2026 duess avoir lieu per gronda part en Grischun: Cun 97:17 vuschs ha il cussegl grond ditg gea a la candidatura. L'ultim pled ha ils 12 da favrer 2017 il suveran grischun. Suenten ina lunga debatta aveva decis il parlament grischun glindesdi cun 98:17 vuschs da tractar en detagl la candidatura per ils gieus olimpics e paralimpics d'enviern 2026 dal chantun Grischun. Mardi ha il cussegl grond tractà la missiva da maniera detagliada. L'emprim punct che ha dà da discurre è stada la dumonda davart l'uschenumnada Host City.

«La citad a la Limmat definitivamain betg «im Spiel»

Il president da la cumissiun predeliberanta, *Peter Engler* (pld, Tavau), ha infurmà che la citad da Turitg na vegnia propi betg en dumonda sco Host City: «Nus prevedsain da dar alloggi a las atletas ed als atlets a Cuira, Tavau e San Murezzan. Quests lieus han survegni da la regenza la dumonda, uss è la balla tar els.» Il president da la citad da Cuira, *Urs Marti* (pld, Cuira), ha communitgà ch'el cussegl communal da Cuira tractia questa fatschenta anc quel di, mardi saira. En connex cun ils allongis necessaris ha rendì attent *Jürg Kappeler* (pvl, Cuira) ch'i na dettia en la chapitala grischuna nagins hotels cun tschintg stailas. Cusseglieier guvernativ *Jon Domenic Parolini* ha manegià che la chapitala haja grond potenzial en connex cun



La debatta davart l'olimpiada en il cussegl grond è stada lunga ed intensa. FOTO O.ITEM

novs hotels causa sia posiziun centrala tranter las differentas destinaziuns ed attracziuns turisticas. «En general èsi da constatar che blers hotels e pensiuns en Grischun avessan basegn da vegnir renovads.» A ses avis pudessan signifitgar gieus olimpics en Grischun in impuls per far questas lavurs.

Schanza per optimar il traffic public?

Conradin Caviezel (ps, Cuira) ha dubità la pussaivladad ch'i saja fixada en la missiva da pudair colliar grazia a la candidatura meglier Cuira cun la piazza aviatica da Tu-

ritg: «Da la staziun principala da Turitg fin a Kloten circuleschan numerus trens dad autras destinaziuns cun bler daplirs passagiers che en ils trens da Cuira.» Perquai nun èsi a ses avis probabel ch'i dess grazia a la candidatura per l'olimpiada 2026 questa optimaziun dal traffic public giu dal Grischun. «Mintga di circuleschan davent da la staziun da Turitg uschè blera gliedud sco sin tut l'ulteriura rait da las VFF», ha ditg cusseglieier guvernativ *Mario Cavigelli*, «tuttina exista anc potenzial per optimar las colliaziuns cun il Grischun.» El ha numnà l'intenziun da construir en

la Val dal Rain sangallaisa in segund binari. «I dovro simplamain temp.» Nagina schanza ha già la dumonda da la minorità da la cumissiun predeliberanta (*Peter Peyer*, ps, Trin) da dumandar per la candidatura dals gieus olimpics in credit d'impegn da mo 4,5 milliuns enstagl da 25 milliuns francs. Cun 96:17 vuschs ed ina abstenziun è quella vegnida refusada. Cun 97:17 vuschs ed ina abstenziun ha il cussegl grond acceptà il credit d'impegn da 25 milliuns francs e pussibilità uschia la preparaziun d'ina candidatura grischuna per l'olimpiada d'enviern 2026.